



WIZARA YA UTAMADUNI SANAA NA MICHEZO

BARAZA LA SANAA LA TAIFA

MSANII

"Maarifa na Ubunifu"

SANAA

— WASANII

— URASIMISHAJI

— MIONGOZO



Toleo la 2



APRIL-MAY
2023



Yaliyomo

- | | |
|---|---|
| 01
Dawati la Katibu Mtendaji | 02
Waziri Mh. Balozi.Dkt Pindi Chana aweka
Hadharani Nominees TMA 2022 |
| 03
Muziki wa injili ndani ya
TMA2023 | 04
Rais mstaafu Dkt. Jakaya Mrisho Kikwete
ndiye "game changer" wa Bongo fleva |
| 05
Zuchu ang'ara TMA 2022 | 06
Sugu ajimwambafai afurahia
uhuru wa Sanaa |
| 07
Mwana FA asindikiza usiku
wa Tuzo kwa mistari | 08
"Konde boy"
atetea tuzo yake" |
| 09
"Nimesubiria zaidi ya miaka
20" Melody Mbasha | 10 Indonesia yavutiwa na
 program za BASATA |
| 11
Basata Yakutana Kuhuisha
Kanuni | 12
NEMC,BASATA kuja na Mpango wa
elimu ya pamoja kudhibiti kelele |
| 13
Tuzo za heshima zaibua
hamasa kwa wadau | 14
Picha na Matukio |

Dawati la Katibu Mtendaji

BARAZA LA SANAA LA TAIFA (BASATA)



Dkt. Kedmon E. Mapana
Katibu Mtendaji (BASATA)



BASATA NI MWEZESHAJI WA MAENDELEO YA SANAA

Baraza la Sanaa la Taifa-BASATA limejikita katika kutoa huduma zinazowezesha uratibu na kufanyika shughuli za Sanaa bila kuweka vikwazo kwa kuzingatia maendeleo endelevu kwenye ubunifu wa kazi zinazofanywa mionganini mwa wadau wake.

Jambo hili limeendelea kutiliwa mkazo kwa watumishi wote wa BASATA kupitia huduma wanazotoa kila siku katika majukumu yao wakizingatia mdau wao namba moja ni msanii wa fani yoyote hivyo kuwa mstari wa mbele kumuwezesha na siyo kumkwamisha.

Aidha, Baraza limekuwa mstari wa mbele kutoa elimu ya maadili kwa vyama, vikundi na Mashirikisho ya sanaa kwa kuwa siku za hivi karibuni kumekuwa na msukumo wa baadhi ya wadau wasio waaminifu kutaka kuitumia sanaa katika kampeni zao ovu dhidi ya maadili hivyo inatakiwa kusimama pamoja dhidi ya kulinde Mmomonyoko wa maadili.

Kila msanii nchini anatakiwa kutambua dhima ya Baraza ni kuendelea kuwa Wawezeshaji wa Sanaa na kuepuka kuwa "Polisi wa Sanaa" hivyo unahitajika ushirikiano kwa pande zote kufanikisha jambo hili.

Falsafa hii imekuwa kipaumbele kwa serikali ya awamu ya Sita kutengeneza mazingira wezeshi kwa kiwanda cha Ubunifu ambacho kimedhihirisha kutoa ajira na vipato kwa tabaka kubwa la wananchi wake ikiwemo vijana hivyo, BASATA kama wasimamizi wakuu lazima wasimamie uratibu na utekelezaji wa sera ya Serikali kikamilifu.



Mhe.Balozi. Dkt.Pindi H. Chana aweka hadharani Nominees TMA2022



Waziri wa Utamaduni, Sanaa na Michezo Mhe. Balozi.Dkt. Pindi H. Chana amewataka wanamuziki walioteuliwa kuwania Tuzo za Muziki Tanzania 2022 kuwa mabalozi kwa kuinadi pamoja na kuhamasisha wananchi kuwapigia kura kwa wingi wateule wote wa TMA ili waweze kufanikiwa kus-hinda na hatimaye kutunukiwa katika usiku wa tuzo.

Ameyasema hayo wakati wa hafla maalum ya kuwatangaza wateule hao iliyofanyika tarehe 06 Aprili, 2023 katika hoteli ya Morena iliyopo jijini Dodoma, hii ikiwa ni mara ya kwanza kwa hatua kama hiyo kufanyika nje ya Mkoa wa Dar es salaam ikilenga kuzipa wigo mpana tuzo hizi na kuzie-neza kwa wadau nchi nzima kwa lengo la kuondoa dhana kuwa Tuzo hizi ni za eneo moja pekee.

Awali akiwasilisha taarifa ya utekelezaji na uratibu wa Tuzo hizo, Katibu Mtendaji wa BASATA Dkt. Kedmon Mapana amewashukuru sana wanamuziki na wadau wa sanaa kwa muamko mkubwa waliouunesha katika Tuzo hizi kitendo kilichotafsiriwa kuwa kila mwanamuziki anathamini na kutamani kupata Tuzo kutokana na takwimu ya waliojisajili kuwa kubwa, ushindani kuwa mkubwa kuititia kazi zilizowasilishwa pamoja na jambo ambalo limesababisha wataalam wa muziki kutumia akili ya ziada kufanikisha zoezi la kuzipitia kazi hizo na hatimayekupiga kira za kuwachagua.

Katibu Mtendaji, ametumia fursa hiyo kutoa shukrani kwa wadau na wataalam ambao wametenga muda wao kushiriki katika hatua mbalimbali kuanzia upembuzi yakinifu (Screening), Kustadi kazi za wasanii na kupiga kura (academy) na hatimaye kupatikana orodha ya wanamuziki wanowania Tuzo za Muziki Tanzania 2022 hivyo amehimiza wanamuziki kutumia muda huu kuhamasisha watu wawapigie kura katika vipengele wali-vyopendekezwa kwa kufuata miongozo iliyowekwa na kamati.



Muziki wa injili ndani ya TMA2023



Waziri wa Utamaduni Sanaa na Michezo Mhe.Balozi.Dkt. Pindi H. Chana ameliagiza Baraza la Sanaa la Taifa kujumuisha kipengele cha Muziki wa injili katika Tuzo za Muziki Tanzania ili kuendelea kuupa thamani.

Ameyasema hayo wakati anaongea na wadauwa muziki wa injili waliohudhuria uzinduziwa albam ya #Hararat ya Christina

Shusho katika tamasha la "Mtoko wa Pasaka" kwenye ukumbi wa Mlimani City, jijini Dar Es Salaam.



Pamoja na maagizo hayo Mhe. Waziri ameahidi kuzifanyia kazi changamoto zinazosumbua Muziki huo hususani kushiriki kwenye matamasha kwakuwa Serikali ya awamu ya Sita imedhamiria kuinua sekta ya Sanaa Kwa viwango vya kimataifa huku akisistiza kushirikiana na wadau binafsi ambao watakuwa tayari.

"Serikali ya awamu ya Sita imedhamiria kuinua sekta nzima ya Sanaa, hivyo anatarajia muziki wa Injili kupata nafasi katika Tuzo za Mwakani 2023, pia amewaomba wadau kushirikiana na serikali ili kuinua Muziki wetu na sanaa kwa Ujumla" amesema Mhe.Balozi. Dkt.-Pindi H.Chana.

Uzinduzi wa albam ya Muziki wa injili ya #Hararat ya Christina Shusho umesimamiwa na Wasafi media chini ya Mkurugenzi wake Diamond Platnumz ambapo umeshirikisha Malkia Rose Muhando pamoja na wasanii mbalimbali wa injili wa ndani na nje ya nchi.



Rais mstaafu Dkt. Jakaya Mrisho Kikwete ndiye "game changer" wa Bongo fleva



Rais mstaafu wa awamu ya nne Mhe.Dkt. Jakaya Kikwete ametajwa kuwa ndiye kinara wa mabadiliko ya mtazamo wa serikali na watu wenyе hadhi kuanza kuamini muziki wa bongo fleva na kuupandisha thamani kuwa wa kibiashara na kuingiza kipato kwa wanamuziki wengi nchini.

Hayo yametanabaishwa na Naibu Waziri wa Utamaduni, Sanaa na Michezo, Mhe. Hamisi Mwinjuma (MwanaFa) wakati anamuongelea Mhe. Dkt.Jakaya Kikwete kwenye jukwaa la usiku wa Tuzo kupitia taarifa fupi iliyoandalila na BASATA ikiambatana na Tuzo ya heshima kutambua mchango uliofanya na utawala wa Serikali ya awamu ya nne kwenye kiwanda cha burudani hususani Muziki.

"Kazi niliyopewa ni kuja kumuongelea Rais mstaafu wa awamu ya nne wa Jamhuri ya Muungano wa Tanzania Mhe. Dkt.Jakaya Kikwete, mimi namuita 'Don JK'...kila mtu asikie ili atambue Jakaya Kikwete ni nani kwenye Muziki wa Tanzania, yeye ndiye mtu ambaye alibadilisha mtazamo wa Serikali na wenyе hadhi kuikubali bongofleva, tulipata stori kuwa, kwenye gari la President kunasikilizwa ngoma za Bongofleva na aliandamana nao kwenye kampeni" amesema Mhe. Naibu Waziri.

Kutokana na mtazamo huo kuwa chanya kwa upande wa muziki wa Bongofleva ilisababisha wadau na makampuni kuongezeka kufanya uwekezaji wenyе tija katika tasnia ya sanaa hii yakiwemo makampuni kutoa fursa ya mikataba ya matangazo kwa wasanii na kuwalipa fedha nzuri.

Taarifa zinaendelea kuweka wazi kuwa muziki wa bongofleva umeendelea kuwa sekta inayotoa mchango mkubwa kwa vijana wengi kujiajiri na kuji patia kipato kwaajili ya kuendesha maisha yao ya kila siku nchini jambo ambalo linaisaidia Serikali kuendelea kuboresha mazingira ya mfumo thabitи wa uvezeshaji mionganii mwa wasanii.



Zuchu ang'ara TMA 2022

Msanii wa lebo ya WCB Wasafi Zuchu amefanikiwa kubeba Tuzo tano katika Tuzo za Muziki Tanzania TMA 2022 zilizofanyika usiku wa tarehe 29 Aprili Mwaka 2023 katika ukumbi wa "The Superdome" Masaki, jijini Dar es salaam.

Taarifa zinazeleza kuwa tuzo alizochukua Zuchu kuwa mshindi dhidi ya wasanii wenzake wa kike na wa kiume katika vipengele alivyow nia imepokelewa na Mhe. Hamisi Tale A.k.a.Babu Tale akiwa ni Meneja na kiongozi wa WCB ambaye alikuwemo ukumbini hapo kutokana na udhuru wa mwanamuziki wake kuwa kwenye maeneo menginekutekeleza majukumu ya kazi za Muziki.



Tuzo zilizompa ushindi Zuchu ni pamoja na, Msanii bora wa kike wa mwaka, Video bora ya mwaka, Msanii bora wa kike wa Bongo fleva, Wimbo bora wa Bongo fleva na Msanii bora wa kike chaguo la watu jukwaa la Kidijitali.

Mara baada ya kuibuka kinara katika Tuzo hizo wadau wameelezea tukio hilo kuwa limekaribia kufanana na rekodi aliyoweka Mkurugenzi wa lebo ya WCB ambaye ni msanii maarufu na kiongozi wake Diamond Platinum ambaye ali-wahi kunyakua Tuzo Saba enzi hizo zikitambuli-ka kama "Kili Music Awards".



Sugu ajimwambafai afurahia uhuru wa Sanaa



Msanii na mwanamuziki nguli wa Hip hop nchini Joseph Mbilinyi a.k.a Sugu au Taita amejinasibu kuwa mara ya mwisho kupata nafasi ya kutoa Tuzo ya muziki ilikuwa nchini Uingereza hivyo hii imekuwa heshima kwake kusimama katika jukwaa la usiku wa Tuzo za Muziki wa Tanzania TMA 2022 katika ukumbi wa "The Superdome" Masaki, jijini Dar es salaam.

Ameyaongea hayo mbele ya mgeni rasmi ambaye ni Waziri wa Utamaduni, Sanaa na Michezo Mhe. Balozi.Dkt. Pindi H.Chana pamoja na maelfu ya mashabiki waliohudhuria ugawaji wa Tuzo hizo ambapo Sugu alipata heshima ya kukabidhi Tuzo kwa mshindi wa Wimbo bora wa Hip hop wa Mwaka iliyokwenda kwa msanii Rosa ree kupitia wimbo wa "Blue print".

"Ninayo furaha kuwa hapa kupresent award mara ya mwisho kupata nafasi kama hii ilikuwa mwaka 2003 kwenye United Kingdom HipHop awards huko London, Heshima kubwa kwa Mhe. Waziri Balozi Dkt Pindi Chana, karibu sana kwenye Wizara yetu, Mungu akubariki sana, tunakupenda Wazri na tunaiona Energy yako, hii ndo dream niliyokuwa nayo siku moja tukae kwa umoja kwenye Award namna hii, nampongeza sana Mama Samia katika hili" amesema Sugu.

Pamoja na hayo, Sugu aliweza kutumia jukwaa hilo kufikisha ujumbe Serikalini kuwa kwa sasa juhudhi kubwa zinafanywa kuinua sekta ya Sanaa nchini hususani muziki, hivyo ni jambo la kufurahishwa mionganoni mwa wadau wa Sanaa ukilinganisha na miaka ya nyuma, ameongeza kuwa muziki huu ukitumiwa vizuri unaimarisha uhusiano kama ilivyo sasa ambapo hadi wasanii wanapata nafasi kubwa za uongozi.

Sugu amemaliza kwa kusema kuwa, kwa sasa amejikita kwenye ubunifu na anasimamia Tamasha la Bongo fleva Honours linalofanyika kila mwisho wa mwezi katika viunga vya Alliance Francaise pia amempongeza Katibu Mtendaji BASATA Dkt. Kedmon Mapana na kumuhakikishia ushirikiano thabiti kutokana na kuonesha dhamira halisi ya uvezeshaji na kuinua sekta ya sanaa nchini.



Mwana FA asindikiza usiku wa Tuzo kwa mistari



Naibu waziri wa Utamaduni, Sanaa na Michezo Mhe. Hamisi Mwinjuma (Mbunge) ameshindwa kujizuia mara baada ya kuvamia jukwaa la usiku wa Tuzo na kutoa burudani yenye hadhi iliyokonga nyoyo za watu waliofurika katika ukumbi wa "The Superdome" Masaki, jijini Dar es salaam.


Shangwe zaidi ziliibuka pale Mhe. Naibu Waziri alipoamuru Dj azime mdundo ili aimbe akapela na kuonesha uwezo wa hali ya juu kutokana na sauti yake kutembea sawia kupitia miondoko ya mistari kutoka wimbo wa "Mfalme" aliyoghani bila kupumzika hivyo kuonesha kuwa pamoja na majukumu mengine bado yupo vizuri kusherehesha wadau.

Awali kabla ya kuwa Mbunge wa jimbo la Muheza {CCM} kuitia uchaguzi mkuu wa mwaka 2020, Mhe. MwanaFa, amejizolea umaarufu kutokana na tungo zake zenye mas-hairi yanayotumia kiswahili kinachovutia msikilizaji kutokana na mpangilio wa maneno uliomfanya kuwa wa kipekee mionganoni mwa wanamuziki wengine.

Amekuwa wanamuziki nguli ambaye ameteuliwa kuongoza kundi kubwa la wasanii kuitia Wizara ya Utamaduni, Sanaa na Michezo mara baada ya uteuzi rasmi uliofanywa na Mhe. Rais wa Jamhuri ya Muungano wa Tanzania, Dkt. Samia Suluhu Hassan mnamo tarehe 26 Februari mwaka huu 2023.



"Konde boy" atetea tuzo yake"



Msanii maarufu na mmiliki wa lebo ya Konde gang, Harmonize amefanikiwa kwa mara nyingine kubeba Tuzo ya Mwanamuziki bora wa kiume wa mwaka nchini kupitia Tuzo za Muziki Tanzania-TMA 2022 na kuwabwaga wasanii magalacha kama Ali Kiba, Marioo, Ray Vanny na mkali wa singeli Dulla Makabila ambao kwa pamoja walifanya mchuano mkali katika kipengele hicho.

Aidha, msanii huyo amefanikiwa kunyakua Tuzo hiyo kwa kutumia wimbo wake wa "Nitaubeba" ambao ni moja ya nyimbo zake zilizotamba na kukonga nyoyo na hisia za mashabiki wa muziki nchini kwa mwaka 2022 hivyo kujitengenezea mazingira ya kupenya kwenye soko la ushindani katika sekta ya Sanaa.

Wakati wa sherehe za utoaji wa Tuzo hizo Msanii Harmonize anayetikisa anga la muziki na kibao cha "Single again" alikuwa na udhuru kikazi katika ziara yake nchini Marekani alikoenda kufanya matamasha pamoja na kutangaza kazi zake za muziki hivyo mwakilishi kutoka Lebo ya Konde gang aliweza kupokea Tuzo hiyo.

Sambasamba na hilo, mashabiki wengi waliohudhuria na kufuatilia Tuzo za Muziki Tanzania 2022 kupitia njia mbalimbali wamelipongeza Baraza la Sanaa la Taifa na Serikali kwa ujumla kutokana na ubora wa sherehe ulioheshimisha hadhi ya Tuzo na kazi za wanamuziki huku wakishadidia kuwa kila aliyefanikiwa kuondoka na ushindi amestahili hivyo wanatarajia kuona ubunifu zaidi ili wapate zaidi au kutetea vipengele vyao kama alivyofanya "Konde boy".



“Nimesubiria zaidi ya miaka 20” Melody Mbassa



Mshindi wa Tuzo mbili ya Mwanamuziki bora na Mtunzi bora wa muziki wa dansi wa mwaka kwenye Tuzo za Muziki Tanzania TMA 2022 Melody Mbassa ametanabaisha kwa hisia kubwa kuwa ushindi alioupata ni matunda ya subira aliyooyoiveka moyoni kwake kwa zaidi ya miaka ishirini ndiyo maana ametiririkwa na machozi wakati anaipokea.

Ameendelea kusema kuwa, kwake yeye muziki aliuanza kitambo sana tangu akiwa mtoto ambapo aliweza kupata msaada mkubwa kutoka kwa wazazi hasa baba yake mzazi ambaye alimsimamia katika misingi ya Sanaa yake ili kuhakikisha kipaji chake kinakuwa na manufaa jambo ambalo lilizidi kumtia nguvu kutokana na imani aliyojazwa na Baba yake.

Ameukumbusha umati uliokuja kushuhudia ugawaji wa Tuzo kuwa, anaa-mini wengi wanaoshuhudia tukio hilo kwa namna moja au nyingine wanayo kumbukumbu nzuri ya tungo kutoka kwa kijana Mtanzania iliyowaburudisha enzi hizo akiwa kijana mdogo unaojulikana kwa jina la “Toto Party” ambao aliuimba mwanzoni mwa miaka ya 2000 na kuwa wimbo pendwa mionganini mwa matukio na matamasha mengi yanayojumuisha watoto.

Zaidi ya yote ameishukuru sana Serikali hususani Baraza la sanaa la Taifa kwa uratibu nzuri wa TMA2022 jambo ambalo linaleta hamasa mionganini mwa wanamuziki kuendelea kufanya kazi zao kwa ubunifu mkubwa kutokana na msukumo wa ushindani, pia amepongeza utoaji wa mikopo kwa wasanii ambapo yeye ni mnufaika



Indonesia yavutiwa na program za BASATA



Balozi wa Indonesia nchini Tanzania Mhe. TRI YOGO JATAMIKO leo tarehe 16 machi 2023 ameahidi kushirikiana bega kwa bega na BASATA baada ya ku-vutiwa na programu zinazoratibiwa na BASATA zenye lengo la kuinua sekta ya Sanaa nchini.

Ameyasema hayo wakati wa maongezi na wajumbe wa BASATA ulioongozwa na Katibu Mtendaji wa BASATA Dkt. Kedmon Mapana akiambatana na Kaimu Mkurugenzi wa Uchumi, Alex Kajuni na Afisa Habari Isack N. Bilali alipotem-belea ofisi za Balozi huyo jijini Dar Es Salaam mapema leo hii kwa lengo la kuimarisha ushirikiano.

Ameongeza kusema kuwa BASATA lina programu ambazo zinaweza kuisaidia Indonesia kujitangaza kupitia majukwaa yake hivyo anatarajia wataalamu wa pande zote mbili kuratibu shughuli mbali mbali sa Sanaa hasa zitakazotoa elimu na kulinda ustawi wa jamii.

Awali akielezea programu hizo Dkt. Mapana amesema kuwa BASATA inadesha Matukio ya kuibua vipaji kutoka mtaani hadi mijini hivyo likipata wadau wa maendeleo inawezekana kuwafikia wasanii wengi nchini.

Aidha amesisitiza kuwa sekta ya Sanaa ina umuhimu wa kupata wadau endelevu kwa kuwa imejidhihilisha kukua kwa asilimia 19.4 mwaka 2021 kwenye pato la Taifa na hivyo kufanya kuongezeka kwa ajira katika nchi na kupunguza changamoto ya ajira kwa vijana. Programu zinazoratibiwa na BASATA ni pamoja na Tuzo za muziki Tanzania, Sanaa mtaa kwa mtaa, BASATA Vibes, Sanaa kwa mtoto, ujenzi wa kituo cha Sanaa na uanzishaji wa kanzi data ya wasanii nchini.



Basata Yakutana Kuhuisha Kanuni



Katibu Mtendaji BASATA Dkt. Kedmon Mapana akiongea na Watumishi wa BASATA wakati wa ufunguzi wa kikao cha siku mbili kujadili maboresho ya Bangokitita ya Kanuni pendekezwa za Baraza la Sanaa la Taifa zitakazowezesha kusimamia ustawi wa Maendeleo ya Sanaa nchini.

Mchakato wa maboresho ya Kanuni za Baraza ni shirikishi hivyo utahusisha wadau wa Sanaa nchini ili kuhakikisha unajikita katika kuwezesha wasanii kufanya shughuli zao wakifurahia Uhuru wa kiubunifu.

Kabla ya kikao hicho, kamati maalum iliyoteuliwa na Katibu Mtendaji wa BASATA iliweka kambi ya siku saba Wilayani Bagamoyo kwa ajili ya kuandaa Bangokitita ikishirikisha wadau wa sekta ya sanaa nchini ili kuja na kanuni wezeshi mionganii mwa Wasanii na wanamuziki nchini.



NEMC,BASATA kuja na Mpango wa elimu ya pamoja kudhibiti kelele



Baraza la Sanaa la Taifa (BASATA) Kwa kushirikiana na Baraza la Taifa na Usimamizi wa Mazingira (NEMC) wamejipanga kutoa Elimu kwa Wasanii,Wamiliki wa Baa na Kumbi za Starehe nchi nzima kuhusu athari za mazingira hususani kelele.

Makubaliano hayo yamefikiwa octoba tarehe 09 Mei, 2023 katika Kikao Cha pamoja kilichofanyika katika ofisi za NEMC jijini Dar Es Salaam iki-wakutanisha Menejimenti ya NEMC ikiongozwa na Mkurugenzi Mkuu wa NEMC Dkt. Samuel Gwamaka huku kwa upande wa BASATA ikiwakili-shwa na Katibu Mtendaji Dkt. Kedmon Mapana, Mwanasheria, Afisa Sanaa na Afisa habari.

Katika Kikao hicho kwa pamoja wamekubaliana kuunda timu ya pamoja ambayo itapitia vifungu vya Sheria na Kanuni zinazodhibiti kelele na mitetemo kwa pande zote mbili na kuja na mapendekezo ya pamoja.

Aidha Kikao hicho kimekubaliana kuandaa zoezi la kutoa Elimu kwa Wasanii, Wamiliki wa Baa na Kumbi za burudani nchi nzima kwani wamebaini kuwa elimu juu ya namna ya kudhibiti kelele hizo ni muhimu kwao ili zisiwe kero kwa wengine.

Kulingana na shughuli hizi kufanyika katika makazi ya watu, BASATA pamoja na NEMC hawana budi kuandaa mikutano mbalimbali nchini kwa lengo la kuwaelimsha wamiliki namna bora ya kutumia chombo cha udhibiti wa kelele kuepuka malalamiko yanayotolewa na wakazi wa maeneo husika.



Tuzo za heshima zaibua hamasa kwa wadau wa Sanaa



Baraza la Sanaa la Taifa {BASATA} kwa kushirikiana na Wizara ya Utamaduni na Michezo katika kutambua ushirikiano na Taasisi mbali mbali ambazo zimekuwa zikitoa mchaango mkubwa katika upande wa sanaa na kuibua vipaji mbali mbali vya Wasanii. Baraza lilitoa Tuzo za heshima kwao na baadhi ya Taasisi hizo ni kama zifuatazo, Chuo Kikuu cha Dar es salaam {UDSM} Chuo cha Sanaa Bagamoyo (TASUBA) pamoja na kituo cha matangazo cha Clouds Media Group.

Aidha Wadau hawa baada ya kupokea Tuzo hizi waliishukuru Wizara ya Utamaduni Sanaa na Michézo pamoja na Baraza la Sanaa la Taifa {BASATA} kwa kuweza kuthamini mchango wao katika kuendeleza Sanaa Nchini. Mwisho walitoa ushauri kwa wadau wengine kujitokeza kuinua Sanaa nchini kushirikiana na Baraza la Sanaa la Taifa BASATA katika kuifanya Sanaa Nchini iweze kukua na kujulikana kimataifa.




Picha mbali mbali za Washindi wa TMA 2022





Picha mbali mbali za Washindi wa TMA 2022





BARAZA LA SANA'A LA TAIFA

Jengo la Utumishi Block B/C/D, 8 Barabara ya Kivukoni, S. L. P 4779, Ilala,
Dar es salaam Simu: 255 22 2863748 Barua pepe: info@basata.qo.tz Tovuti: www.basata.go.tz